

TAQUKA'ARSURTA TAN'URQA

Walter Meganack-rem quli'anguallra
 Jeff Leer-rem igarluku Qikertarmiu'atestun

- 1 Tan'uraq allrilumek pisuumallria taquka'arsurluni.
 2 Legta tekicamiu qinercimaluni,
 3 qinercami taumi tangerlluku arnaq taquka'aq,
 4 arnauluni legtem iluani,
 5 nuqluku itrimaluni.
 6 Anguteqiitii taqukaraam piinani, pisurluni,
 7 nuliran quliraucimaluku.
 8 Ukuk taqukaraak tamallkuk.
 9 Suugem legtemi qinercani,
 10 nulira arnauluni,
 11 taug'um itertesimaluku,
 12 iterngan taumi neregkûarluku.
- 13 Muluwailan taumi wiinga alairluni,
 14 qakma tailuni,
 15 iterluni legtemen.
 16 Awa'i nuliran nuuyamaluku tan'uraq una pisurta keluminun.
 17 Wiinga niugcimaluni iterngami,
 18 "Engaa! Sugcuning!"
 19 narluku suk.
 20 Kita nuliran taug'um arin, suugem aritii egluku,
 21 "Una nar'an," pimaluku.
- 22 Tawani uksiluteng.
 23 Nerkutaquneng-ruq neqlianek, qiullrianek,
 24 iqallugnek neqlikunek,
 25 kenertuumalutek kennguamek legtem qukaani,
 26 aigani kenrem quliinun lliiluki,
 27 urugteslluku uquni neqlikutaquni.

28 Uksuq nangluku ell'utek.
 29 Ell'uteng tawani taug'um taqukaraam anguteqiitiin nalluluku
 30 arnaan keluani et'engraan.

31 Awa'i ugnerkarngan anyaurcateng anumaluni wiinga,
 32 takuciqniluku lla castun et'a.
 33 Taqukaraat an'aqameng legtegteng ii'utaa'umakait,
 34 lla maliglluku,
 35 castun macaq.
 36 Agluni, ii'uluni, aturluni,
 37 qakma wamluni.
 38 Pingayuatni alarcimaluni,
 39 engaa!
 40 alarlluni,
 41 awa'i tangerningainiluku nulini ilutmen pimaluku,
 42 "Kitum pitaqciqaanga-ruq,
 43 ugnerkarpak ili kiagpak."
 44 Taumi nulira taugna anegkunani patesnaklluku.
 45 Mal'ugnek uswiillra'angqerllutek taquka'anguagnek.
 46 Kita awa'i una cali ang'aqurluku nuuyaani pisurta.

47 Qaugcinek qawartaqaacan wiingan anucillra anumaluteng.
 48 Awa'i taqukaraam atkuni all'uku,
 49 amini all'uku,
 50 ankutarngami uswiillra'ani atkugteslluki.
 51 Kita ankutarngamek allertuumaluku tan'uraq,
 52 "Ukuk uswiillraraak pigken.
 53 Nunagpenun-ruq tekiskuut
 54 piugtet qiluutiitni qecengtaaqina
 55 piugtem uswiilraraagka caqtaryua'ak
 56 kelugpetesnun nunagpetesnun tai'aqamta."

57 Awa'i una nunaminun tekicami tan'uraq pisulleq
 58 quli'anguicimaluki pellatestelleni nani elnguq,

- 9 uksusinaq nangluku nani elnguq,
 0 taqukaraam legtiini ec'imaluni.
 1 Piugtet qiluutiitni qecengtaa'umaluni
 2 piugtet kuniryaturluki,
 3 tangerllukek taugkuk taquka'anguak piugtet qimaglluki.
- 4 Qaugciatni piugtet qilungraata,
 5 calinermini tagumagkunani
 6 arnaq pingakegkengani nayunerminiu,
 7 qesaluni tagumagkunani.
 8 Muluraarluni kita tagumaluni takuluki kangiillkelluki.
 9 Qangiq piugtet taquka'anguak caqtaumalukek urqepiarlukek.
 0 Aaniita kita ketgûarwikumaluku suuguluni
 1 niu'uqurluku tan'uraq,
 2 "Naama allertuqemken
 3 piugtet qiluutiitni qecengtaa'asqelluten
 4 uswiillraraagken takulukek.
 5 Alartuten guangni,"
 6 taqukaraam taug'um pimaluku,
 7 kita amini at'eraarluku
 8 tan'uraq taugna caqtarluku urqepiarluku.
- 9 Awa'i iquklituq.